

東南紀事

東南紀事目錄

卷一

唐王聿鍵

弟聿鏐

聿鏐

卷二

魯王以海

卷三

黃道周

蔣德璟

路振飛

曾櫻

傅冠

卷四

金聲

楊廷麟

萬元吉

曹學佺

姜一洪

吳聞禮

鄭爲虹

王士和

胡上琛

蘇觀生

卷五

張國維

徐石麒

熊汝霖

孫嘉績

錢肅樂

朱大典

余煌

陳潛夫

陳函輝

張肯堂

吳鍾巒

卷六

鄭遵謙

劉穆

王之仁

王正中

于穎

吳易

卷七

王翊

王江

邵一梓

俞國望

陳天樞

王善長

章欽鄰

馮京第

闕

卷八

王毓蓍

潘集

周卜年

倪舜年

高岱

沈之泰

徐復儀

趙天麟

闕

華夏

卷九

張煌言  
羅繪  
葉振名

卷十

黃斌卿  
  
周崔芝

張名振

卷十一

鄭芝龍  
  
鄭成功  
上

卷十二

鄭成功

下

鄭鴻逵

明人讀書能尙氣節辨義利當南都淪覆鼎命已  
遭臣藉閩浙滇粵殘局奉孱王以支撐山陬海澨

年雖跋涉逃竄疲於奔命而忠義感發不計成敗固足以  
維繫綱常矣明季野史雖多非限於見聞卽取材厯雜其  
閒善本蓋寡

國朝纂修明史自有體裁不暇詳爲紀掇餘姚邵念魯先  
生康熙時人距明季未遠尙有一二耆老可資諮訪又海  
內平一故其見聞亦非限於方隅者可比撰東南紀事十  
二卷以存魯王唐王西南紀事十二卷以存桂王辭尙體



要無慚作者昔常璩著華陽國志崔鴻著十六國春秋馬  
令陸游皆著南唐書載記一類實輔正史並行軼事遺聞  
賴以不泯邵氏此書亦其次也惜書成未刻僅鈔本流傳  
往年馬端愍公撫浙擬刻此書懸百金求其本不可得  
幸得見之遂刊諸梨棗冀勝國諸臣忠義之烈久而彌新  
且與華陽國志諸書並傳不朽亦藝林勝事也光緒甲申  
九月邵武徐幹識

東南紀事卷一

餘姚邵廷采念魯撰 邵武徐 幹小勿校刊

唐王聿鍵 弟聿鏐 聿鏐

唐王聿鍵小字長壽太祖第二十四子唐定王之後定王  
李賢妃出也洪武二十四年封於唐國南陽永樂六年之  
國子靖王靖王無子傳弟憲王再傳莊王成王復無子傳  
弟恭王之子敬王敬王繼統三十餘年壽七十一世宗時  
屢存問再傳順王端王端王之孫是爲聿鍵自定王至聿  
鍵凡九世初封德昌王父世子義母毛氏端王惑嬖妾囚

義承奉所聿鍵方三歲從之稍長讀書能識大義雖處內  
難正志不挫義爲弟所毒端王諱之將傳次子守道陳奇  
瑜入弔謂王曰世子薨逝不明若又不立其子事必發覺  
王懼始爲聿鍵請名立爲世孫崇禎五年王薨鍵年三十  
一嗣位七年流寇披猖聿鍵念南陽要衝而城痺薄捐千  
金謀修築知府陳振豪弗授功聿鍵以爲言崇禎帝震怒  
逮振豪置理聿鍵又援潞王近事乞增兵三千人設參將  
一以陳永福充之不許八年冬賊再犯南陽上疏臣府護  
一千二百人近制以其半爲開封班軍給撫臣以下絲使

無謂惟明詔念臣困厄以全軍見還報曰南陽班軍番直  
祖制已久朕不敢變時朝廷欲行宗室換授之法陳子壯  
署禮部事執不可聿鍵貽書子壯相駁難其書稱說典訓  
援據經傳皆有本廷臣顧弗及知特以爲諸侯王尙氣持  
異同而已會子壯下獄衆口惜子壯者輒以尤聿鍵聿鍵  
亦薄公卿不足重而爭宗藩體統劾總督盧象昇不朝其  
所建請頗多羣臣交忌之九年八月京師戒嚴聿鍵率護  
軍勤王汝南道周以興止之不聽至豫州巡按御史楊繩  
武以聞旨下切責會前鋒值寇亡其內豎二人乃還國廢

爲庶人安置鳳陽高牆使者欲以檻車往聿鍵自裁不殊  
至鳳陽守陵閹人求賄不得墩鎖困苦之聿鍵不勝辱病  
幾殆妃曾氏割股進始愈有司廩祿不時資用乏絕時望  
氣者以高牆中有天子氣言於淮撫路振飛振飛假賑罪  
宗入牆見聿鍵心獨異之聿鍵告吏虐狀振飛上疏請加  
恩罪宗贍以私錢且謫其吏之無狀者福王初立大赦聿  
鍵出高牆封南陽王遣官送寓平樂未行而南都陷南陽  
王至嘉興前刑部尙書徐石麒淮撫錢繼登等請留監國  
王不可六月八日潞王監國於杭州王拜賧賀越三日

大清兵至塘橋諸王出降瑞王惠王亦自紹興降初靖魯伯鄭  
鴻達邂逅王京師相識至鴻達移軍還閩追浙河王方至  
戶部主事蘇觀生翰林張家玉等咸以王可濟大業與鴻  
達奉王南行諸臣慷慨交拜矢獎明室共議王歸國王覽  
啓悲慟進衢州收散卒得千餘人廿八日朝見臣民於建  
寧閏六月三日次水口驛驛吏具大舟卻之乘民舟不飾  
綵幔導去鼓吹民人聚觀相慶臨驛解朝謁行四拜禮王  
答三拜賜坐安南伯鄭芝龍靖魯伯鄭鴻達巡撫都御史  
張肯堂閩廣督巡劉若金巡按吳春棧戶部侍郎何楷大

理卿鄭瑄左通政馬思理光祿少卿林銘鼎四川按察使  
曹學佺御史郭貞一諸臣自南都來者皆素服待罪旨弗  
問時議課州縣修宮學佺曰仁聲儉德王政所先睿駕甫  
臨而先有茲舉不肖有司因而蠹民無乃彰王過乎亟止  
之王欲擇戶部尙書咸舉何楷楷辭王諭曰往崇禎乙亥  
孤聞邸抄得侍郎掖垣諸疏藏之中心已非一日古云臨  
危杖節必敢諫中求之其勿固辭楷乃受任曹學佺陳三  
事其一福建正供悉貯兵饟毋或濫支以防不給其一禮  
成之後卽命鄭鴻逵抵關相度防守進取事宜以聞其一

禁游兵行剽令舊軍速招歸伍以紓民王曰此海內宿儒也命悉允行初七日王監國於福州祭告天地設行太廟唐國宗廟用太牢駕入城居南安伯府二十七日卽帝位詔曰朕以天步多艱王室不靖荷茲監國已及經旬四方懷風勤王之師漸集方躬履行陣莫敢竄居而文武臣僚咸稱渙萃之義責於立君寵綏之功本于天作時哉弗可失天定靡不勝朕自顧闕然未有不績以仰對上帝祖宗自臨安委轡尊攘無期小大汎汎有如河水朕敢不敬承勉從羣望爰稽載籍光武聞子嬰之信六月卽位鄙南以



是年爲建武元年誕膺天命昭烈聞山陽之信四月卽位漢中以是年爲章武元年立宗廟社稷艱危之中豈利大寶亦惟興義執言繫我臣庶之志以今揆古豈曰不宜其以今年七月一日以後爲隆武元年奉天翊運定難功臣次第進爵稍俟恢復裂土酬庸宣猷守正文臣亦進級孝秀耆宿軍民人俱優給所在山川鬼神除淫祀不在典制者皆遣正官精禋祭告以明朕纘承基緒爲天下請命之意先是張肯堂建議如唐肅宗故事以監國稱天下兵馬大元帥俟復南京然後卽位王尙猶豫羣臣多勸進乃從

之以布政司爲行殿門曰行在大明門駕自督府移蹕芝  
龍戎服前導鴻達以禁旅百官次扈從侍班鵠立始聞環  
佩之聲及寅王御袞冕升殿受朝賀頒詔於各省府州縣  
大赦是日南郊大風揚沙拔木尙寶卿馬驚玉璽墜地損  
其一角人咸嘆異上唐國四親帝后號謚改福建省爲福  
京福州爲天興府府學爲國子監百官俱稱行在論翊戴  
功封鄭芝龍爲平魯侯鄭鴻達爲定魯侯鄭芝豹澄濟伯  
鄭彩永勝伯張肯堂爲吏部尙書吳春枝兵部尙書周應  
期刑部尙書鄭瑄工部尙書曹學佺太常寺卿起蔣德璟

黃景昉蘇觀生何吾騶黃鳴俊陳子壯林欲楫曾櫻朱繼祚傅冠皆爲大學士閣臣至二十餘人然票旨多王自裁俱閒無事或遠未達軍國大政一委芝龍行朝仰成而已是月鄭遵謙等起兵紹興進守錢塘金聲亦扼徽州阻上江由是閩嶺晏然藉以休甲尋命芝龍兼戶兵工三部尙書開府天興坐見九卿入不揖出不送

大清順治二年乙酉七月朔王下詔親征詔曰朕痛念祖陵閔

茲萬姓中心搖搖如在水火擇於八月十八日亭午禡祭親統六師勅平魯侯芝龍爲御營中軍定魯侯鴻逵爲左

先鋒尙賴文武諸臣襄力効謀有功者賞朕不爾負命訪求十六朝實錄及古今遺書諭行在日用以儉樸爲本有司不得背旨阿奉違者以不敬論勅司禮廳天壽行宮中毋用金玉器帷幔毋用錦繡濃花洒線止用居常銅錫布帛王長齋日御便殿見大臣性好讀書手自披覽常丙夜不休南都之敗馬士英奔浙江潞王監國時猶持故態執黃道周章不下後遇亂軍踉蹌流涕落屣竄方國安營中聞王卽位又謀入覲鄭芝龍雅善之言士英不卽北降亟欲求立太祖子孫罪可貰下其議於朝堂王出獨斷傳諭

各關軍將毋納士英初王在杭州訪故臣於張家玉家玉舉黃道周王曰得此商羹周鼎當爲廊廟羽儀至是道周自衢州入見喜稱之曰眞名相也卽日晉少保吏部尙書武英殿大學士入閣辦事王以家玉直起居注家玉言唐魏謩爲文宗起居舍人文無避諱不令人主見今陛下自待豈啻唐宗臣愚亦不肯居魏謩下王嘉納家玉嘗薦句容人何成吾敏吾兄弟天下奇才乃心明室且家近南都可觀賢又句容知縣宗室議澁王心識之及金聲自徽州遣諸生戴明恩齎奏至詔陞聲兵部侍郎僉都御史巡撫

池太徽密因授成吾總兵敏吾爲副與聲犄角共取南京  
敕成吾曰兵行所至不可妄殺有髮爲順民無髮爲難民  
此十字可切記也敕議澁曰朕自許忠孝爲法受過百折  
千磨今爲祖宗復仇有進無退宗卿朕猶子行其克悉朕  
心出險亨屯助朕以助祖宗於乎欽哉高廟亦孚祐爾于  
無窮議澁成吾等結七十二村聚衆至八千人卒不就而  
徽州告急

大清兵進建昌命永勝伯鄭彩出關援之汀州大旱斗米三百

錢王決意親行乃封弟聿鏐爲唐王監國福州某爲鄧王

勸守都城駕發芋江父老遮道泣留復止鄭芝龍沮之也  
是月以副總兵施福守崇安關命首輔道周出師江西浙  
東諸將奉魯王以海監國於紹興王卽位詔至魯王欲守  
藩大臣張國維熊汝霖陳函輝等以爲舉足一勸義師星  
散浙亡閩亦危願堅奉監國以督厲將士事成入關者王  
於是不受隆武年號使者劉中藻廢然而返王心雖弗能  
善然猶藉錢塘爲外屏手書致魯王曰朕與王同氣共本  
聖祖王無忘朕之焦勞朕無忘王之危厄一誠金石豈惑  
浮詞當遣兵赴王上報孝陵王其愛玉體以需天休八月

乙酉以鄭芝豹爲前軍左都督賜總兵黃蜚璽書令屯太湖收兵聯絡三吳庚寅以黃斌卿爲官義兵馬招討總兵官帥舟師屯舟山便宜恢取南京王御門親餞百官郊送壬辰立妃曾氏爲皇后后性警敏頗知書有賢能聲每召對奏事后於屏後聽其決進止王頗嚴憚之罪倡逃辟邵武知府吳文煒絞推官朱健叙廣信知府解立敬鉛山典史周寅生守城功贛州告急命上游巡撫吳春枝移駐邵武汀州總兵陳秀援建昌參將周之蕃剿武平以陳豹爲防海將軍鎮漳泉興汀惠潮授南昌人羅大任少詹事募



兵恢南昌黃雲師大理少卿募兵恢九江南饒贛州人曾  
應遴兵科給事中募兵援贛州遣張家玉監鄭彩軍招撫  
上華謝朝恩丁未副總兵楊武烈守備元體中復新城命  
都御史楊文驄誠意伯劉孔昭分屯處州王郊天南臺鄭  
芝龍鴻逵皆稱疾不出何楷劾二勲不陪祭無人臣禮王  
賞其風裁旣而鴻逵扇於殿上楷呵止之楷告歸盜截其  
耳於道詔追盜不得時軍興饑亟芝龍請於兩稅內五石  
預借銀一兩民不樂從反愆正供以浦城訓導王兆熊爲  
御史督義饟不輸者榜其門不義於是閭里騷然芝龍又

請括寺田王不聽封芝龍子森爲忠孝伯賜姓名朱成功  
總督禁旅督師何騰蛟自長沙楊廷麟萬元吉自贛州皆  
遣使奉表迎乘輿大學士蘇觀生請先行出屯南安王幸  
雍祭酒賴垓進講三品以上官坐聽其餘侍園橋觀者濟  
濟遣使冊封桂世子由根爲桂王黃斌卿兵敗於崇明永  
寧王起兵復建昌撫州副總兵施福入弋陽

大清

兵大舉臨廣信攻福張家玉使洪旭林習山救之是月靖  
江王亨嘉稱帝於桂林舉兵入梧州執巡撫瞿式耜贛州  
萬安軍亂九月兩廣總督丁魁楚圍桂林瞿式耜應之執

靖江王亨嘉送福州廢爲庶人其黨皆伏誅論功封魁楚  
爲平越伯晉式耜兵部侍郎副都御史焦璉陳邦傳等加  
秩有差亨嘉尋病死王意不次用人擢鎮江諸生錢邦芑  
爲御史大學士熊開元爭之不得已而邦芑議開元開元  
引退又出內降用王期昇彭遇颺路振飛曾櫻皆言不可  
乃已時粵閩之境盜賊蜂起汀州大饑且疫兵民所在鬪  
譁兵疲饑匱而出關之議竟同築舍四國人心遂至瓦解  
乙未祭告天地太廟丁酉禡駕出洪山橋祖餞鄭鴻逵鄭  
彩授鉞是日風雨晝晦二將行數十里仍疏稱候饗皆不

行庚子曾后廟見先一日王遣官用牲預告祇見之意命  
勳臣芝龍行禮丙午大祀天地於南郊命兵部主事徐孫  
彥頌詔於四方擢浦城知縣鄭爲虹御史巡仙霞關仍知  
浦城命太僕少卿林蘭友巡撫江西諭之曰江西憔悴於  
貪政久矣卿往須破情格以朕先教後刑先情後法八字  
行之又八字曰小貪必杖大貪必殺能行此十六字始不  
負朕親簡耳設蘭臺館纂修威朝實錄以曹學佺領之召  
閩縣老人周良屏問民疾苦冬十月

大清張天祿陷徽州巡撫都御史金聲死之金堡奏言福京倚

新安爲北門而臣前至仙霞見鄭鴻達方遣兵出關臣度其駐三衢耳不能長驅也陷旣四十餘日矣我師逗留觀望未有爭先之氣新令日行民心日變異時以精兵數萬仰而攻之猶當徘徊於衢嚴饒信之間能保其必下乎起義舉人汪沐日奔走乞援曲折素諳不以此時捲甲疾趨乃令偕葉向曜借兵借饟待其集事須五十日大事去矣四方望閩中之兵如在天上今兵力將心臣已窺其大略上江疑而楚豫斷新安去而三衢危陛下卽欲爲王審知豈可得哉堡數危言王嘉其才氣而鄭芝龍不悅授禮科

給事中出監鄭遵謙軍

大清金聲桓會兵圍撫州永寧王告急張家玉言腹心之患在  
南昌咽喉之患在徽州旣失徽則饒嚴危失饒嚴則廣信  
必不支而崇關不能守陛下大事去矣兵貴速不貴久貴  
合不貴分我以待兔之愚長彼蠶食之漸坐而自斃請急  
勅鄭彩由杉關出撫建分兵一擣南昌一援饒州再令黃  
光輝曾德等由江山直上衢嚴襲徽歛縱不能進亦可自  
救諸將施福陳梧等皆善家玉計而彩久駐邵武不肯出  
關有詔切責亦不從家玉太息而已是月李自成將賀珍

擊敗張獻忠兵於漢中十一月十五日監軍張家玉退

大清兵於許灣家玉約陳輝林習山蔡欽三道會許灣夜人定  
後火起令堅壁敢救火者斬且搜暗處置伏旦兵果大至  
四面突擊洪旭爭先斬級兵少卻家玉親立陣前督陳黃  
虎李明忠趙珩等出營大戰殺兩總兵獲級四百奪馬四  
十匹器械無算午時協將陳有功戰死大軍合數萬來戰  
矢如雨下沿山舉火赤地震裂

大清將王得仁鄧雲龍侯天寵等以書來招趙珩令其勸降衆  
惶惑多偶語珩懼互相疑忌家玉執珩手拔劍斫案曰行

閒離我兄弟我等益當勦力爲國吐氣軍中敢疑謗者有  
劍人心始定然猶無戰意十五日子時家玉設高皇帝關  
壯繆位牽諸將泣拜設賞金於前使郭毓卿李明忠陳良  
趙珩分帥死士百人伏谷中遂拔大營走大兵合一萬來  
追入伏大軍紛拿家玉鼓譟回軍大破之步兵五千殆盡  
騎兵舍馬渡河溺死過半撫州圍解論者以是役爲福州  
戰功第一家王令都司黃瑛齋蠟書間道奔入撫州檄永  
寧王部將謝志良閻羅宋蕭聲曹兌光等乘虛襲老營十  
六日戰於金坡家玉夾擊大軍死者五百餘人馬死者三



百餘匹營中婦女三百四十三人就近親戚歸之收其酒米犒軍得鄉紳諸生書悉令燒毀時

大清

兵所至令民薙髮而南軍遇無髮者輒殺不問難民因是多輸牛酒爲間導南軍咫尺不得虛實饟導俱絕家玉設小牌免死給與難民歡呼來歸者千百人奏請遣人分入鄉落解散有能收復州縣者卽以首領官酬之陣沒陳有功葉壽予祭葬廕謚立祠許灣斬總兵逃者許象乾俱報可於是軍政明肅人始用命家玉奏功俱歸永寧王詔俟恢復南昌日卽封親王是月魯王勞軍於西興拜方國安

爲大將統諸營十二月朔日有食之吏部郎趙玉成與尙書張肯堂同籍江南上言臣等生長海濱請以水師千人從海道直抵君山襲取南都以迎陛下計陛下陸行期同會於金陵王大喜命鄭芝龍具艘芝龍笑諾會有言水師諸臣宜留其家口以防逃歸者事不果於是王決意親行是月六日發芋江命芝龍留守福京制置兵饗兼掌宗人府事南平古田縣民遠餽酒米封鄭遵謙爲忠義伯前汝南兵備副使郁啟遣趙貴入賀以啟爲總理楚豫提督軍務討逆安順兵部右侍郎巡撫河南詔輔臣黃鳴俊出衢

州東會王肅眾來朝立春日受百官朝勿賀

大清將張天祿誘執大學士黃道周於婺源生致南京道周死之是月臨安蒙白土舍沙定洲作亂據雲南黔國公沐天波奔楚雄定洲追之天波走永昌

大清順治三年丙戌正月王在芋江初九日夜雨雹如拳唐鄧二王及居守百官行拜賀禮不受下詔以三大事自責羣臣俱戴罪馬金嶺兵變命路振飛往浦城安撫都御史陸清源犒師浙江魯王使陳謙奉書稱皇叔父不稱陛下王怒下謙獄鄭芝龍與謙有舊錢邦芭出芝龍門而見親於

王密奏議爲魯心腹與鄭至交不急除恐變生王斬謙浙  
閩聘好遂絕川陝總督樊一蘅遣官入賀交趾日本皆遣  
使入貢並手冊答之勅上游巡撫吳春枝簡練壯丁賜松  
滋東會瀘溪延津四王春宴銀廣東布政司湯來賀浮海  
轉餼十萬遷戶部右侍郎江西御史艾南英劾來賀奸邪  
不可信用不報王出師次於延津拜泉州布衣蔡鼎爲軍  
師召郭燁陳秀引兵赴建寧命朱成功出永定關江西巡  
撫劉廣胤都給事中曾應遴招撫閩寇以黃光輝兵敗貶  
鄭鴻逵爲少師責鄭彩戴罪上游巡撫吳春枝罷以吳閩

禮代之賜降將郝搖旗名永忠璽書賜大學士王應熊於四川假便宜舉用大小文武官大雨雹冊皇弟鄧王長子琳渼爲陳世子從征視膳中書官講讀導以禮儀加守金華兵部尙書朱大典閣銜命與方國安和衷同濟時艱十六日鄭彩逃入永定關張家玉曰新城永定屏障福京門戶不可棄也彩怯竟棄家玉逃入關城中兵民皆竄家玉與知縣李翔仰天慟哭誓死不去以鄉兵二百人扼守新城以親兵百人戰於城下數十合殺五百餘人大軍馬步圍家玉三周家玉中流矢墜馬折臂氣絕都司林雄冒襍

被入陣殺一將挾家玉還營家人已遇害王聞報大怒曰  
統兵大將盡走入關獨令文臣陷陣何以自解家玉乞骸  
骨曰臣得從八旬王父母五旬父母生還相見死無復恨優  
詔慰答時閩兵在廣昌距新城二百里家玉嚙指血書請  
救廿二日間兵至南豐

大清兵引退是月沙定洲陷大理蒙化屠之洱海道楊畏知起  
兵於迤西定洲還圍楚雄二月二日王駐蹕建寧故相何  
吾騶入覲以爲首輔閩饟不足鄭芝龍白遣給事中梁應  
奇督運廣東奏劾稽饟者數十人命逮問亦莫應潮州知

府楊球遂止粵界不敢入芝龍令撫按以下皆捐助有官助紳助大戶助又從李長倩言開事例大鬻官爵部司道三百兩餘百兩武劄數十兩至數兩於是倡優厮隸盡列冠裳拜謁官府鞭撻里鄰守令泣訟兩造皆稱職官側立而語互毆於庭不可制受害者延頸

大清兵謠曰清行如蟹蓋遲其來也晉張家玉右僉都御史巡撫廣信制曰爾許灣捷而建撫復壯猷追允文采石之前新城守而杉關寧嘉績在萊公鎖鑰之上今者箭瘡勿藥宗社賴之爾其卽日領敕長驅誓於今歲拜我孝陵家玉

陞辭言募兵制器非一人一日可理天下盡忠而且智臣  
獨忠而且愚他日有急陛下無以尹鐸爲少聞者悲壯其  
言先是李自成已死其黨李錦高一功等尙數十萬衆因  
湖南巡撫堵胤錫請降胤錫表聞乞封錦等爲侯王難之  
家玉及檢討蔡之俊合疏言曲突徙薪事幾不再當乘其  
銳氣會擣金陵勿令轉合敵人後悔噬臍遂封自成妻高  
氏爲英淑夫人錦左軍侯賜名赤心一功右軍侯賜名必  
正餘皆封侯軍名忠貞營攻荊州將克會大霧赤心等方  
蓐食忽救兵數萬至師大潰胤錫急令楊國棟張光翠分



守澧州回子河以固湖南晦命輔臣傅冠及朱成功督郭  
燾陳秀等拒

大清兵於永定關加謝德溥東閣大學士制置義兵張家玉自  
請募兵惠潮王遣之三月奪鄭彩永勝伯爵及黃鉞賜劍  
敕書命民被迫翦髮者監義民旗自別白命成功招集鄭  
彩逃兵毋令擾民王將取道於汀命募兵汀州施福林順  
至建陽以張名振爲捧日將軍副黃斌卿屯舟山贈松江  
死事夏允彝沈猶龍章簡李待問侯承祖等官有差吳江  
吳易起兵於太湖授右副都御史陳子龍僉都御史楊廷

樞兵部主事廿四日

大清兵陷吉安萬元吉退守皂口傅冠自邵武趨建昌饗饋後  
軍不進拔營歸冠乞罷不許夏四月金華行宮成遣官迎  
駕王諭近臣曰靖義侯方國安江上戰功獨多勲臣劉孔  
昭世臣中深明大義辭公爵來歸科臣劉中藻奉使開詔  
挺然義形於色勲臣鄭遵謙起義獨先誠心翊戴勲臣黃  
斌卿雖未有恢復顯功而拒守舟山相機進取此數臣者  
朕均倚爲腹心手足在廷其體朕心毋致嫌疑優詔晉貴  
州巡撫范鏞右都御史諭雲南巡撫吳兆元卿久鎮滇疆

無遺朕南顧憂贈黃土隘死事元體中李茂德等八人黃  
斌卿襲殺副使荆本徹奪斌卿伯爵晉湯來賀兼行在兵  
部右侍郎便宜恢剿湖東立三御營以郭煒爲鎮武營陳  
秀爲威武營黃光輝爲勇武營五日王壽節不受賀用太  
牢遙祭二祖列宗配以唐國祖宗以程珣廵撫惠潮

大清兵薄崇安大學士蔣德璟自請行關詔責施福逗留曰與  
張家玉守新城而鄭彩逃入關何異福退死三尺易若前  
向死敵德璟請告歸泉州六日皂口兵潰萬元吉入贛州  
故贛督李永茂自南雄遣吳之蕃張國祚帥粵兵五千拔

贛贛城倉皇爭竄元吉欲斬其妾之出署者人心乃定十七日

大清兵圍贛州元吉與兵科給事中楊文薦悉力拒守蘇觀生引所部退走南康王念國家元氣之削由於靖難命追復建文年號立方孝孺祠設姚廣孝像於階下又追復吳王允燭衛王允熲徐王允熿及建庶人封諡冊封趙王命撫臣盧若騰就近行禮擢袁彭年吏科都給事中晉土司沐增太僕少卿沐懿四川右布政以勸義輸以總兵包象乾守汀州籍石寧建瑞亂民之壯者爲兵汰老弱歸農遣黃

興施福守崇安林順曾德守仙霞歲滿更番水軍都督周  
崔芝遣人如日本乞師王卽位一年無尺寸功羣臣建義  
者衆兵尙書呂大器言用人太濫所用人又相援引虐民  
叢盜望治何由御史湯芬言可發海師直擣吳浙主事吳  
鍾巒言首克南昌選鋒進取爲上策若舍此他圖關門一  
有騷動全閩震驚矣王皆善之而不能行諭臣民曰爾等  
立朕爲君志在救民雪祖朕將暫至邵武相機出關古人  
創業中興誰不危而後濟朕以寧進死不退生六字自誓  
如有敢請駕回天興及避幸廣東者立斬以殉亡何閩侯

二縣耆老詣延津請駕回福京王太息曰卽位十有一月  
日夜所思何事豈得回鑾但恨在閩不能安閩閩民不負  
朕朕負閩民多矣建寧諸生請大駕再臨建水王曰朕進  
取之志甚銳萬無轉蹕之理鄭鴻逵久頓兵關門一日兵  
譁誤謂大兵至徒跣棄軍逃歸二日夜抵浦城詔削其爵  
芝龍則請閩饟共需一百五十萬王諭之曰卿兄弟擁  
戴朕躬朕所委託但國蹙民貧錢糧止有此數所奏卽竭  
三省之力不足從未有關籬不固止於家門堵賊者此理  
甚明今議以兵三萬守關一萬守腹不復可增若有別議

旁撓是彼蒼不助中興朕亦惟有退避賢路而已王聞沙  
縣寇患詔蠲逋賦是月閩中地震撫州陷永寧王死之以  
新撫永安沙縣山寇隸陳國祚受朱成功節制兵部侍郎  
于華玉以漳州兵入衛至歸化不戢士民閉城拒之命華  
玉及羅登輔留止順昌張思道留止歸化俟駕來從行敕  
曰朕痛兩京淪沒全非寇敵之故止因兵民相戕致危宗  
社今日僅此彈丸冀資民力恢復若復傷民將促國脈新  
兵未經節制故譁卿宜振刷務令民安毋徒憂謗廣西酋  
長農國琦破縣城逐知縣巡撫晏日曙討平之獲國琦傳

首詔解散脅從勿獻俘以示寬仁遣禮部尙書黃錦往潮  
州與新撫商度出贛總兵曹志建劾閩兵將領張安兵無  
紀律有詔止安入關土賊攻陷詔安知縣田樹死之仙遊  
民變檄總兵周仕鳳速提兵援浙西敕唐鄧二王毋私受  
官民章奏必由通政司封進方不失藩王體違者輔導官  
方士亮何九雲治罪至於詞訟應歸有司通政司不許封  
進再錄平靖江庶人功封潯梧參將陳邦傳爲富州伯賜  
平越伯丁魁楚鐵券賜西夷安承宗府名頒印以勸來降  
者五月諸軍潰於贛州大軍銳甚滇粵諸軍先後至南康



者以數萬計皆惴恐莫敢卽下楊廷麟白雩都趣張安張  
琮李元符及各營兵四萬至贛江撫劉廣脩亦自寧都募  
二千人至俱以五月一日先後潰散廣脩被執失士馬器  
械無算自後援兵益不敢前蘇觀生退次南安大軍分兵  
東圍廣信王敕觀生曰援贛兵將驕悍不馴聞警輒思引  
去似此無紀之兵安能濟事雩都會昌諸邑旣可直達汀  
州防圉尤急曩無一人議此何耶僨軍之將罪之不能呼  
之不前如何爲策退守庾關豈朕所望其詳度情形來奏  
敕監軍御史陳賡曰前失吉安起於鄉勇引敵他兵坐視

不救良可痛恨滇兵戰而不勝猶愈不戰而逃者爾仍收  
合餘燼勿自困挫諭楊廷麟曰吉安失守萬元吉諸兵皆  
付一擲今五月初一失機此番功罪宜明卿深惟善計更  
圖興復粵饒三萬與卿召募但當作何約束近民苦兵甚  
苦寇驅虎進狼綠林四起當是統兵者之過包象乾張家  
玉毋得收聚凶徒終成潰散朕將前蹕汀州面議方略廣  
信陷召羅登輔謝祥昌兵入守長汀

大清兵至常山敕朱大典顧應勳馬步兵入援諭何吾騶曰田  
闢之兵敢行潰叛大安關外復有失挫卿其強出爲朕分

憂徐孫彥使蜀還陞見具列王應熊樊一衡李乾德馬象  
乾米壽圖劉鱗長王之瑞萬年策鄭逢元劉泌范文光牟  
道行田華國莫宗文曾英楊賡賈登連譚誼等勦力恢疆  
奉揚王命且言張獻忠殺戮川民無孑遺生民以來未有  
之禍王爲之揮涕封方國安子元科爲定中伯以周崔芝  
領水師爲平海將軍和順王慈燦言建陽百姓因大兵久  
屯溪不敢漁山不敢樵王曰如此何以聊生令兵毋入城  
毋久屯犯者以聞張安復姓名爲陳丹引兵迎駕以爲御  
營副總兵尋令復出贛州從蘇觀生以周損巡撫廣信召

武岡守將劉承胤入援遣撫臣劉中藻賑温州永福雁湖  
寇亂知縣田楷平之間吳易戰勝於太湖晉兵部尙書右  
副都御史加陳子龍兵部右侍郎兼翰林學士復封黃斌  
卿戚魯伯以施福爲忠勇將軍命主事李言撫寧化清流  
亂民潮撫劉國柱獲潮陽賊首莊三權琉球世子遣使入  
賀貢方物江西江黃各砦義師起特用文臣守關張調鼎  
周道臣趙秉樞守永定關謝紹芳周維新守大安關黃大  
鵬鄭爲虹守仙霞關再發恤民庫銀一千賑温州王曰奇  
荒至此千金之寡安能徧活數十萬人之命乎命撫臣盧

若騰鎮臣賀九堯速爲設防毋使甌民重困山寇入詔安  
城夏至祭皇地祇宗廟命福京太常寺行禮簡討何九雲  
進尙書以其弟九祿爲國子學正星變下詔修省求直言  
以李士璉爲討逆將軍晉太子太傅設行在御營十標以  
郭奇陳天榜熊和王秀奇陳文廉方登夫巢拱極領之又  
遣林塗募兵於福寧王謂左右曰延平地窄朕不欲久居  
俟虔南收拾當卽發也時有傳王欲幸廣州者張家玉在  
潮州上疏曰天下形勢關中爲上襄陽次之建康又次之  
下此則虔州一塊土尙屬興王地也天下望陛下出江西

而忽傳有南幸五羊之說識者懼矣駕出虔州右連三楚  
左達八閩後屏梅嶂出兩粵之粟前跨章江南九有建瓴  
而下之勢騎天下之脊而號召之所謂六龍臨江勇氣百  
倍上策也若暫駐雄州可出江則度庾關下貢水可出楚  
則遶韶郴出衡岳進止緩急由我中策也若入五羊斯下  
策矣宋景德間契丹寇澶淵王欽若江南人請幸金陵陳  
堯叟閩中人請幸成都臣五羊人計應出此獨恐車駕日  
南中原失望不如寇準爲卓見高宗南渡李綱宗澤岳飛  
等屢請還東京而汪伯彥黃潛善力阻之卒有明州之難

宋之不延由東遷失策也高宗時兩河三吳皆無恙綱等  
猶以去就爭之況今越在五嶺一失足則大事盡去臣敢  
不以死爭哉虔城不滅晉陽萬元吉不滅尹鐸乞陛下必  
以爲歸王終未決贈黃道周爲文明伯謚忠烈官其四子  
妻封一品夫人立廟福州及漳浦鐫其絕命詞於廟門是  
月廿七日浙東兵潰方國安入紹興劫魯王南奔六月朔  
大清兵入紹興魯王自江門入海方國安方元科馬士英阮大  
鍼皆降

大清大軍至金華大學士朱大典堅守不下周藩安昌王長子

恭懷浮海來朝封爲安昌王命劉孔昭嚴嚴所部毋犯  
土以著臣節命福寧道王芋遣兵一千出援温州福州宮  
土成益鄭芝龍歲祿五百石廕一子錦衣千戶陞湖廣監  
軍道章曠右僉都御史提督軍務恢撫湖北嚴起恒戶部  
侍郎總理湖廣錢法張家玉招程鄉賊黃元吉降之寧化  
賊黃通襲執兵部侍郎于華玉蘇觀生兵潰于南安賜異  
人薛通載號廣濟禪師往海外徵兵贈張惟熊右都督謚  
武襄諭盧若騰賀君堯監守温州加若騰兵部右侍郎君  
堯太子太傅王子生大赦福州鄉試取葉瓚等百餘人十



六日

大清兵入上杭檄曾德還守仙霞關贛州諸將及

大清兵戰於李家山大軍退屯水西賜贛州改名忠誠府加楊  
文薦右都御史是月沙定洲復圍楚雄秋七月湖廣都督  
張先壁郝永忠合疏迎駕黃元吉復畔攻破永定張家玉  
使賊黨執斬之復招降鎮平賊陳靖之衆十餘萬歸農是  
月

大清兵破金華朱大典死之遂至衢州副使秦應科內應城破  
守將張鵬翼及楚王晉平王樂安王皆被殺督學御史王

景亮亦不屈遇害

大清兵將度仙霞金堡說上言今日之勢誠能直走湖南用何  
騰蛟之銳竟搗荆襄傳檄中原北方聞之以爲陛下從天  
而降此上策也移蹕虔州此中策也并兵出關背城一戰  
敗不徒死此下策也若往來延建觀望經時輕騎叩城避  
不暇出爲無策之王卒出無策而鄭芝龍間使約款於  
大清盡撤施福等守關將軍還安平手敕遣中使邀之曰卿稍  
遲朕與卿同行芝龍不顧由是

大清兵平行入關至建寧守臣黃大鵬鄭爲虹死之八月廿一

日王發延平御營皆散猶載書十車以從至順昌聞

大清兵已及劍津倉皇乘馬奔從者何吾騶郭維經朱繼祚黃  
鳴俊吾騶尋去惟經奔贛州王入汀州界不知所之曾后  
被執自投九龍灘八閩皆下大學士蔣德璟路振飛傅冠  
禮部尙書曹學佺先後死鄭芝龍自安平降是年十月四  
日贛州陷大學士萬元吉楊廷麟兵部尙書郭惟經等死  
之蘇觀生退保廣州

論曰唐王寬明恭儉親親尊土循良愛民而有撫綏大略  
識張家玉之奇俊崇黃道周之耆德褒忠行義結於至誠

聞江陰涇縣力守見屠曰吾家子孫遇此二縣之人雖三尺童子亦當憐而敬之每誠出兵毋殺難民傷促國慨大小主客文武衆庶恩勤和劑咸出其肺腑瀕死無貳待永明王以大公論羣臣曰太宗適自屬永明朕在此間去永明千里不暇相求臣民敦迫勉行卽位然行年四十未耀前星不審永明才度何如良用關切此可見其義矣惟制於鄭氏不獲展尺寸然兩奪鴻逵彩侯伯而諄諄諭芝龍和衷共功消其亢慢使臣以禮隆世所難使其遭際中興豈必在令主下哉昔賈生過秦責子嬰以不能救敗未爲

通達事體唐王在位雖一年而大江以南驕將劇盜望風  
歸命此其關係國運亦有由來故特月而紀之使後來者  
得以考焉

唐王聿錫隆武弟也乙酉七月封唐王監國福州隆武家  
法嚴不以友愛故假借嘗敕王毋得私受臣民章奏必由  
通政司封進方不失藩王體王甚率謹在福州一年未嘗  
有過福州既陷王泛海達廣州時兩廣總督丁魁楚等已  
奉桂王監國梧州大學士蘇觀生不欲曰吾受大行厚恩  
死無以報今其親弟在何外求君遂與故相何吾驤布政

司顧元鏡侍郎王應華等請王監國十一月五日卽位於廣州以明年爲紹武元年命觀生專理軍國重事吾騶應華元鏡並入閣辦事是月桂王亦卽位肇慶

大清將李成棟自漳汀入陷潮州惠州十二月二日廣州總兵林察誘敗肇慶兵於海口殺總督林佳鼎觀生戰勝而驕十四日成棟以十七騎晨襲廣州城中兵悉西出宿衛尙萬人不及集觀生急召得百餘人

大清兵下城擊之皆散走王變服踰垣走王應華家不納尋縋城走洛城里爲成棟副將杜永和所獲安置東察院成棟

使人餽食王不食曰吾若飲汝一勺水何以見先帝於地  
下自縊而殂自卽位至是日凡四十日太僕卿霍子衡司  
業梁朝鐘行人梁萬爵皆死之觀生亦縊十八日殺諸王  
之在廣州者十六人周王益王遼王皆遇害吾騶應華降  
顧元鏡先椎髻號於市曰

大清天兵至此汝百姓今安枕矣成棟欲大殺廣民佟養甲曰  
廣民未迎戰請卜諸天天雨者則止夜雷震雨如注養甲  
曰天墮淚也乃止猶大掠三日謂之放賞婦女多自裁後  
二年成棟來歸吾騶復入肇慶爲首相元鏡以反正功復

擢用

黃宗羲曰唐桂之搆外懼方張又生內變蘇觀生之罪又何逃焉然觀生受前王特達之知其立後王也與荀息之不食言可以並矣豈僅僅修魁楚之隙哉若後王之從容遇難所謂亡國而不失其正者豈可以地之廣狹祚之修短而忽之乎

唐王聿錡亦隆武弟蓋紹武建號日封李成棟陷廣州王得逸率宗族去依虎賁將軍王興于文村興事王甚謹成棟歸桂王入肇慶王奉表稱賀廣東再陷尙可喜累攻招



文村文村食盡重困已亥桂王入緬文村始降興自焚死  
王亦服腦子薨卒不辱

論曰唐王兄弟三人皆儒雅有君人之度與他藩絕殊惠  
宗之遭靖難紹宗之當末造皆關世運非獨一家之事黃  
宗羲著行朝錄稱壬辰八月刑部侍郎王虞石自五指山  
至廈門言隆武在彼爲僧賴垓熊緯皆從亡信如斯言何  
與惠宗相類耶又云建寧代死者爲唐王聿釗然則聿釗  
亦勇而知義其有否未可知要之宗臣多仁賢則雖亡不  
亡矣又云五指山勅使至故臣皆不能決癸巳二月復遭

使存問諸臣稱離五指駐平遠將起兵故臣乃具公疏請  
勅驗視卒不可得當傳疑以俟後之考古有識者

東南紀事卷一